

LOU LEBEROUN

La cadeno de Leberoun s'estiro dóu levant au pounènt, de Manosco à Cavaïoun sus aperaqui 65 kiloumètre. Lou pendis ubacous s'atrobo forço ribassu, e davalo soude sus la plano. Lou pendis miejournal, pas tant ribassu, s'estajo pulèu vers la plano.

Pèr franquì la mountagno, rèn qu'un soulet passage, la coumbo de Lourmarin que desseparo la cadeno en dos partido.

De Lourmarin à Ate: **Lou Grand Leberoun**, di cimo arredounido que la plus auto a pèr noum lou "Mourre Negre", que s'aubouro enjusqu'à 1125 mètre d'autitudo.

D'aquí la visto s'alargo e, d'un coustat l'autre, se vèi tout l'espandidou:

- dóu coustat dóu piemount miejournal vers Ventùri e lis Aupiho;
- dóu coustat dóu piemount ubacous vers la mountagno de Luro, la valado de Durènço, lou planestèu de Vau-Cluso e, mai proche, lou païs d'Ate e la valado de Calavoun, ribiero o pulèu vabre que davalo di gorgo d'Oupedeto. La majo part dóu tèms asseca, vengue l'aurige, se pòu gounfla dins rèn que quàuquis ouro e veni ennega la valado e la vilo d'Ate. Lis ancian, à-n-aquéli mountado dis aigo dóu riéu i'avien mes "li cauvounado".

Lou Pichot Leberoun, mai moudeste pèr soun autitudo 720 mètre, se presènto pulèu parié à de planestèu cava de gorgo de cop prefoundo e de vabre o gaudre. Sus lou pendis vira vers lou miejour, lou climat es pulèu mieterran e parié pèr sa vegetacioun; aquí atrouvaren lou roumanin, lis auciprés e li chaine.

Sus la cimo crèisson li faiard, li pin e li cedre de l'Atlas. Aquélis aubre soun pas naturau dins lou massis; soun esta planta en 1863 e, à bèl èime, an fa soun espandido.

Après Lourmarin, vilage basti au piemount miejournal, la routo s'esquiho dins la coumbo e, seguissènt la pichoto valado de l'Aigo-broun, mounto vers lou còu dóu Pouchu; davalara pièi, rapido, travessant lou planestèu di Claparedo, vers lou païs d'Ate.

Lou Leberoun es esta classa "pargue naturau regiounau" en 1977. Lou pargue recuerb 140.000 eitaro e aperaqui 60 coumuno, tant dins lou despartamen de la Vau-Cluso que dins aquéu dis Aup de n-auto Prouvènço.

La voucacioun dóu pargue es d'apara lou mitan naturau e soun equilibre emai de desveloupa li coundicioun de vido dis estajan e sis ativeta agrico. Deja an crea d'oustau d'infourmacioun en Ate, à Buous, e La Tourre d'aigo. De mai, soun estado traçado li draio de descuberto dins la fourèst de cedre (Pichot Leberoun) dins li terro coulour d'arcano (*les ocres*) de Roussihoun e de Rustrel.

Antan, fai d'acò mai de 220 milioun d'annado, aquí fuguè la mar. N'en porton testimòni li foussilo di couquihage que s'atrovon dins lou massis. S'es meme descubert de dènt de requin foussilisado dins lou relarg de Cucuroun, pichot vilage au miejour de la cadeno.

Pau à cha pau, au debana di milenàri, se coumblè la mar. Faudra pamens espera li 80 milioun d'annado davans l'èro nostro pèr qu'enfin lou Leberoun faguèsse surfàci e tambèn lou païs que vendrié, un jour, la Vau-Cluso.

Dins la sablo abandonado pèr la mar, lis argiello richo de ferre dounèron i paisage li coulour esbrihaudanto, roujo, jauno, vióuleto que fan di colo de Roussihoun, lou bèn nouma, emai de Rustrel, un païs dóu relèu estrange e forço acoulouri qu'apelèron lou "Colorado prouvençau"

